

## ■ OR DA LA VITA DA LUDMILLA CAHENZLI

# Il fritg da l'educaziun sin la planta fallada

«Mamma, jau dovr trais ordinaturs.»

«Ordinaturs?», dumond jau. «Per-tge?»

«Mettain per far urden.»

Jau sun paff. Mia figlia vul far urden cun ses plunder! Quai è nov. Onns ora hai jau predegia ch'ella duaja metter ils fepls da scola en ina mappina. Jau n'avess gnanca pretendi ch'ella ordineschia cronologicamain quest material. Naba. Sch'ella avess mo mess ensemen mintgamai ils fepls da chemia e quels da geometria. Ma ella stgadanava tut mo sin ina pluna, saja quai ussa fepls d'anglais, receipts da cuschinar u verbs franzos. Ed ussa vai tuttina anc or en bain. Mias admoniziuns portan fritg.

Jau vom ina lingia a tschertgar ordinaturs. En il pult d'Eugen chat jau dus ordinaturs veders ed als port a mia figlia.

«Na, quels èn grusigs. Jau less novs.»

Raschun ha'la, pens jau guardond sin ils ordinaturs grischnairs. Sch'ella ha gust da far urden, na ston ins betg tarladir tut cun ordinaturs stgiffus.

Dus dis pli tard essan nus en papetaria. Igl ha in'entira paraid cun ordinaturs. Giudim quels per 3.80, entamez quels per 8.70 e sisum quels per 16.80 che tegnan in'entira perpetnadad.

«Stoss jau prender ils pli bunmargads?», dumonda mia figlia.

«Na, ti mo prenda ils buns», di jau. Sche mia figlia cumenza ina vita rugalada, na less jau betg far da ranvera. En tals muments ston ins sa decider per rauba da qualitat.

«Ma, quels entamez fissan atgnamain buns avunda», di mia figlia.

«Na, gliez. Ti mo prenda rauba endretg», di jau.

Mia figlia tscherna in ordinatur rosa, in clerblau ed in violet. Jau paj l'investiziun. Cura che nus bandunain la stizun, fa ella: «Ussa vom jau immediat a far urden. Sas tge ch'jau vi tut metter en ils ordinaturs?»

Ils figls da l'onn passà probabel en l'ordinatur rosa, quels da l'emprim semester en l'ordinatur clerblau ed il material actual en il violet, pens jau. Ma jau di: «Jau na sai betg. Tge mettas en ils ordinaturs?»

«En l'ordinatur rosa met jau tut ils heftlis dad 'in Touch'. En il clerblau met jau ils posters ch'jau hai rimnà sut letg

en. Ed en il violet vegnan las fotos da mias amias.»

I dat muments ch'igl è meglier da tashair. Da laschar valair ch'jau sun ina mamma uschè naiva, na fa betg da balsegn.

Ils fritgs che l'educaziun porta na creschan betg adina sin quella planta ch'ins avess gugent.

**Il cudesch pon ins retrair online tar Lia Rumantscha [www.liarumantscha.ch](http://www.liarumantscha.ch) ([http://www.liarumantscha.ch/sites/content/online\\_shop.html?shop:view=details&shop:productid=2830](http://www.liarumantscha.ch/sites/content/online_shop.html?shop:view=details&shop:productid=2830)) u tar mintga libreria**

